

南潯志卷三十八

里人周慶雲纂

碑刻三

清

長生塔院記

順治五年董漢策撰石舊在南柵塔院今佚據張志載文

余自丁亥歲始好爲瞿曇家學夏五與同人習梵唄於烏戍之古山寺有曳杖而過余者爲漁庵禪師芒鞋雪髮形似壽藤卽席無遜讓輒論止觀兼談參學不半晌曳杖去臨別顧謂董君云潯南有片席地在古長生寺傍爲君家故物盍授老衲終老焉余唯唯師遂去不顧越兩載又有挾刺來晤者爲此山禪師此山禪師者卽吳門孝子周澹成寔漁庵之法嗣也時漁庵已

南潯志

卷三十八

碑刻三

一

歿爲伸請寺傍地將瘞靈骨成先師之志余遂舉券授之此翁旣爲其師建塔遂誅茅左側朝夕禮誦用酬法乳亦如向年廬墓時呼天而醴泉發攀條而羣鳥哀也居有間余方鍵關潯湄夜夢羣鬼千億計環余書屋叫號悲嘯不少休或斷骸折肱或挈童戴白其強壯輒操戈鋌以來漸相逼余以所執玉如意擊之鬼卽敗退伏地搏顙云我等所以來皆兵火之後絕命喪軀者遺骸沈草莽無藏埋地願先生爲熟計之余試舉近壤某某所羣鬼輒不熹爲舉長生塔院則粲然願往余卽呼令前去去至院中方與此翁坐話緣起廡以外嘈嘈如沸禁之不可有侍余側者緇袍角巾若世間典吏狀操簿書白事云若類眾多法令難遏必分其州閭庶免蝸蟻矣余頷之吏卽草禁約懸廡下

沸聲迺息覺而異之平明余卽走柬此翁備言前夢遂捐貲倡始勸募鳩工焉凡建塔二區直漁庵師塔之左右繞以長垣蔭以封樹廣收遠近遺骸之無主者及居民之喪無葬地者分別藏兩塔中工財無侵幽明以和嗟乎叔季以後掩骼埋胔之風不可復見矣吳越固多火葬危橋廢址散漫髑髏抑且干戈相尋枉亡載道青燐夜起衰草悲風何族何名莫窮端緒黎邱之飛魄空啼凶厲之崇壇不祀於斯時也有一開土爲擇吉壤覆藏而祝嘏之九原有知必共歡慶此疇昔之夜所以見夢於余也耶則是役也以宏師仁以廣錫類皆此翁之志不可以不記余故備書本末刻石塔傍使後來者觀覽焉

塔院捨券

順治五年立石九年續刻正書舊在塔院中今佚據
澗錄載文

南澗志

卷三十八

碑刻三

二

立捨券董帷儒向有本宅老貳房家人張安結欠本宅借本將鎮南長生寺旁箋四圩地二畝七分五釐平屋四間抵銀四十兩至順治戊子仲春臨濟天倪老和尚法嗣此山禪師懇施此地爲天老和尚塔基并建普同塔本宅今將錢項地屋俱捨訖自他均利緇素咸安亦代爲故僕作福也況此地故僕得之長生寺僧復歸空門元稱至便立此捨券存照

東至長生大樹 西至張家田地 南至張田董田 北至河

順治五年二月 日立

董帷儒

押名上有印
章帷儒二字

信士董雲襄今有箋四圩田七分坐落長生塔院前願捨爲放生池自後任憑開墾此照

東至長生樹 西至董田 南至張田 北至塔院

順治九年十一月 日捨 董雲襄章印 見捨丁文在章印 施虎臣

押

三禪師骨塔題字 無年月正書在塔院 中文已載祠墓

普同塔碣 無年月正書在塔院 中文已載祠墓

張丹山潯錄塔院捨券碑在山門左旁天井牆內塔在韋馱

法像東偏牆內地藏殿天井兩旁有塔亭兩座

重修雲興寺碑記 順治八年董漢策撰在北柵外雲興寺文已全泐據笠翁內篇載文

潯水北奔入具區猶建瓴也其北者觸岸東折俛行數十里而後循軌順流以達五湖嘗試憑高睇之見其奔也如怒其伏也如阻其流也如兔脫檻而鋌走焉當其阻有古刹匯之寺影蔽

南潯志

卷三十八

碑刻三

三

溪流數里復見又試訪諸父兄曰此古雲興寺也宋元祐間創建至元末燬矣萬厯甲申宗伯公復捐資募眾信整飭舊規蓋六十餘年而後頽廢也夫寺自宋至今方五百餘年耳幾經興廢其間風雨之所剝蝕兵火之所焚爍寒煙秋蟲之所棲宿不知凡幾而潯水北奔如昨昔故曰物之麗者輒有遷流大抵然也辛卯秋印翁叔復起而更新之不一月軒甍如刷條已改觀往來稱歎謂此不止爲宗伯公誌不朽且爲元祐諸公誌不朽也于是寺僧明心者昌言曰寺有興廢率苦無恒產使有田足以給行腳則眾信所捐捨以葺堂院不難遂發願結千人緣立產爲贍僧計請記于予予嘉其志謂元祐諸賢倘計及此則寺當至今存夫物之蠱者壞極有事則趣于太平又大抵然也自

今日以往倘有樂山水而遊如張志和棄仕宦而遊如范少伯
藉吏隱而遊如杜樊川者放舟具區渺然無際而憑眺之暇藉
寺憩息南望潯水憶我潯中人有能重新此寺如今日則且與
吳山越水同其春秋豈興廢所得限哉是爲記

重建張王廟碑記

順治十五年正書凡二石在南柵廣惠宮三
清殿右壁據拓本載文

廣惠宮者起自北宋治平年在鎮則爲鄉約所奉道則爲張
王廟或曰三清殿閱南渡至有明數百餘載其間葺輯概不
勝記惟萬曆四十八年傾圮垂弊道士朱太和虔修告飾中堂
平涵朱公感之樂輸與董氏醵錢遂爾復興嗣後思宗十年
迅雷暴雨烈火風捲一時殆盡誠異事也而說者以爲外立
王天君火官位尊內設張大帝水神體卑故各施明通雨火

南潯志

卷三十八

碑刻三

四

隄發然終屬無稽姑不具論特原思宗暨今二十餘載莫能復
興住持沈允修腸日九迴與其徒隱瑜擊梆拖鍊誓必重建癸
巳肇業丙申豎柱較之太和殆無以過于是士大夫及商賈咸
憫其誠而樂爲助究以兵荒財盡戊戌尙未獲雋乃銓部蘊
公沈公者以宏慈普濟之德蠲蒼生于丁選一時權畧之惠佐
萬年之香火牆垣殿宇率爾告就蒙其庇者甯止家祀戶頌已
耶卽

三清若有藉云詩曰靡不有初鮮克有終諺云行百里者半于
九十皆言末路之難也然則允修不遇銓部繕其後雖如太和
之值中堂創其始亦無益耳故廣惠之成當以銓部爲第一云

武林流寓道人張初龍潛閻氏撰

此上第一石

護法 金之俊 董印科 沈焯 朱岫 唐頎

唐彥暉 莊允城 朱錫如 張中慮 張初龍

董靈預 董麟科 董衡 錢威 董渠成

董崢 董嶸 莊允堡

本鎮油坊典舖鹽木各行與諸善信名留梁木不及細載

領願 紀振源 楊心海 龐仲卿 姚懷宇 紀仁甫

于培之 陸允源 金湛文 張德甫 王楚三

蔣白雲 李建宇 沈成章 鈕孟爽 徐念卿 丁季源

錢雲岐 聞楚雲 滕憶梅 顧孟甫 李慕橋

袁振寰 蔣文生 陸澄源 金仰山 潘仁樓

金諫卿 毛瑞甫 沈駕甫 曹思竹 崔順甫

南潯志

卷三十八

碑刻三

五

勸緣 朱文明 陸君祝 蔣冲宇 沈友梅 呂秀竹

盛敬橋 毛悅樓 陸瀛洲 方振宇 朱舜章

陸含章 鈕又文 袁耀甫 沈稚卿 姚錫卿

沈清宇 計友溪 倪愛溪 陸君宇 張蘭石 潘敬湖

張順溪 王奉吾 陸心宇 韓君茂

保副 貝仁宇 錢蘊先 金西潯 沈冲源 王周生

沈敬河 嚴體田 沈師啟 胡奉溪 張敬溪

張奉臺 鈕振山 李爾朴 李元貞 毛欽甫

朱思源 錢思山 凌采臣 沈仁甫

順治戊戌歲元月 吉旦本宮 首道 紀錫元 沈允修 等立

若隱道人屠士杰書

旌邑梓人湯

元甫 達甫 鑄此 二石 上第

按題名中朱岫卽朱佑明董麟科卽董漢策

重修通利橋碑記

年月未詳董漢策撰正書在南柵通利橋東
塊華家術額通利橋碑記五字平列文已

全泐據笠翁內篇載文

潯之南宋元時爲安吉州路設縣曰鄆至今衢砌井甃往往見
于嘉應廟側有橋當其衝曰通利鄉人指爲華家橋云自宋元
迄今千有餘歲中更興廢而里中長老乃重葺之或請記于予
予曰嗟乎立乎今世以指宋元潯水湯湯固如昨昔矣其間城
郭樓櫓雲甍鵲桷盛如連霞散如晨霧不知幾何也抑毋論是
卽斯橋之左右古刹如南林長生者紺殿亘十餘里縱廣約百
畝澹梵相貝書宏鐘寶鐸麗若繪績今且聲兆杳鬱沈爲荒原

南潯志

卷三十八

碑刻三

六

行行周道顧瞻太息賴二三耆宿拮据之餘僅存遺址而蟲蝕
秦經苔侵蕭榻一俯一仰感懷繼之則斯橋尙存幸也雖然凡
利物者壽自利者夭當日潯以內外金馬畫舸傳呼火城中得
勢則驕失勢則妒惟私利是圖故兵燹威棱爲之浣濯獨斯橋
也于朝涉則鄭車于焚脩則葦渡于避地則桃葉于行遊則烟
艇不自言利人咸利之故歷數代而至今猶存且更新如昨昔
矣今潯中萬家烟火往來目爲小都會乃至自燕秦而南者謂
千里無與匹偶余願里中諸父兄學橋之鄭車爲卹寒學橋之
葦渡爲指迷學其桃葉也烟艇也爲知幾與高蹈則將以橋之
壽壽諸父兄又嘗考之載記當時有華府君者能行仁義凡里
中利物之爲莫不爲則斯橋名屬華氏殆其人歟又不知府君

曾仕歟否歟仕則介宋元之間干戈方熾利物最難而不仕更難今去府君世遠矣其指畫幹辦焦心勞思不可得見而橋至今存存暨佐助府君者贊歎肩勞瀦塗襪刷不可得見而橋至今存嗟乎斯橋尚存幸也予小子敢不以貞珉壽之使千百年後頌諸父兄功與通利橋俱不朽

沈登瀛南潯備志據史志湖州南宋改安吉州元爲湖州路今日宋元時爲安吉州路甚不分明又自秦設縣以來吾潯惟晉宋齊梁陳屬東遷前後皆屬烏程今日設縣曰鄆此野老之荒談也至云宋元迄今千有餘歲則幾爲桃花源人矣華府君名文勝爲江州參軍故報國寺布施記稱華七府幹

南潯志

卷三十八

碑刻三

七

則固嘗出仕矣咸淳六年嘉應廟牒有父老華元實卽文勝之子是時文勝已卒宋猶未亡亦非介宋元間人也

禁革舉報堡長告示

康熙九年正書在西柵祇園寺文不錄

萬善庵碑記

康熙二十八年董漢策撰石舊在北柵萬善庵今佚據張志載文

潯北萬善庵始于明季啟禎年間有東明永遠兩比丘尼皈依弁峰瑞白禪師已久篤信向上募潯北隙地于旌節先慈顧孺人遂建紺殿稍葺廚溥辛卯壬辰之交延陽山崧濟師住持二載未底厥績歲在癸巳潯鎮善信咸稱嘉禾保壽院常一大師道行高妙於是金表孀嚴太夫人同先慈暨皇甫母周孺人具質信請師住萬善方丈師係普明二巖和尚法嗣寔臨濟宗二十九世幻也和尙之法孫也當是時先慈與嚴太夫人係中

表妯娌皆信乾竺稱同志恒有事于靜修朝夕清齋若雁行焉以故善功無不舉舉必有成如萬善延請高禪其一端也人謂大師禪宗傑出必以拈頌棒喝爲事而師殊不然專脩淨土其儀軌略似雲棲而仍重參學以故遠近翕然歸之不數年堂宇宏敞金像煥赫復闢庵右菴圍於是香積寮廓咸備經今三十七年矣潯之人若不知有大師住萬善方丈者亦無募冊乞請在鄰近者師殆所謂禪淨雙脩堅持密行者歟夫禪與淨固兩無礙且兩相益也今試拈一句稱名而直窮落處則知識絕思維斷忽爾漆桶底脫得大休歇然後水盡山窮坐看雲起彼落日金繩寶林珠閣風聲鳥語如影響現則成就慧身不由他悟是爲萬善具足較諸莽蕩撥無者相去不霄淵哉以故出大師

南潯志

卷三十八

碑刻三

八

門下者遵守斯旨如首座持真永寧等十餘人皆成令器今師年七十餘以書抵余請爲記余追維先慈捨地敦請之遺志今幸有成不可不傳述也於是乎書

重修東藏禪寺碑記

康熙三十年正書在東藏寺毘羅殿庭左側據拓本載文

粵自碧瞳飛錫江東肇起於赤烏珠字傳經維下宏基於白馬辟支佛現綠玉成臺舍利城標絳雲覆院當永明宣化之日正武肅射潮之秋由是於越仁祠鷺在山而若舞勾吳精舍猿就洞以如歸寺所由來爰云舊矣潯水東偏有東藏禪寺者地當江浙之交山集魚龍之座固苔水南來第一名藍也有明神宗時先大宗伯金門納履爲投老之皋夔蓮社揮犀乃閒情之蘇白適遇雲棲大師靈雨沾花比雁宕之智者慧雲燭日繼鑪峯

之遠公始乍識夫鈴音便聲聞之契合既一通乎玉札遂心地
之皈依水乳交融鍼磁互入侍中別院盡付光明都講家珍悉
歸崇化更有華亭秩宗儒林祭酒方讀書於中祕已證真詮雖
翔步於木天心參密諦林間支許咸聆屑玉之清言方外雷陳
洵號斷金之元契大檀越現宰官身而護筏豈見僧疵善知識
依菩薩戒以建幢能調物性金闕獨揚宗教賜紫伽黎璇宮請
設師容演青蓮果紅樓鬱起俱盡地以布金紺塔高凌復從空
而砌玉手植庭前櫨樹枝似青銅風來閣上鯨鐘聲侔元鐵洎
乎尚書折簡特叩微言大士飛牋親宣奧旨現三身而閱世侶
乎世有去來設七處以徵心實則心無生死遂使無知木石亦
證虛靈甚而障法波旬皆爲外護杳靄鴿王之舍功雖欠於合

南潯志

卷三十八

碑刻三

九

尖玲瓏鷺子之軒德已幾乎配昊覽千年之海水方覲一清延
百禩之眞風已更三葉心嘗薄乎吐鳳夢每愜乎懷蛟何人敢
檄北山有願棲眞西土於戊辰清和之月際康熙廿七之年策
敬踵前徽聿開新範因考蓮祖於五世特延具空之法師爰諷
貝葉於三年實建大悲之懺法矢志霞衣塔護智慧重輝齋心
寶樹燈然沉迷立救主東林之繼席又覩花開必鉢之枝新遠
祖之華幢重聞鳥轉菴羅之樹將見三千螿子悉曉聽經五百
魚兒咸能悅性則百旬止觀寧爲有漏之因千夜槌空便結無
生之果於是錁諸紫篆勒彼青珉狻猊蹲無量之碑使繡蟠於
薊臺鼻鳳架頭陀之碣看織絢於吳蠶

里人董漢策撰文

董穀士書丹

同里殷 卓題額

康熙三十年歲次辛未四月八日建

此下有里人及沙門題名本寺田地畝數檀越助資

眾姓並不錄

放生河題字

無年月正書在東藏寺山門旁

極樂庵西偏留嬰堂碑記

年月未詳董漢策撰石在極樂庵文已全泐據董志載文

王道無私靡不覆載天喬娟蠓尚涵煦之何況嬰孩之甫離母懷亟須保抱哉昔

世祖章皇帝誕敷親仁既已恩浹四海嘗

諭侍臣申禁溺女於是京畿之樂善者建育嬰堂分命阿保專以收養棄孩為務於中每月放生兼惜字紙月之八日士大夫

南潯志

卷三十八

碑刻三

十

畢集覩斯勝舉者輒隨量喜捨福利日崇愚曾躬與良會慨然思古之仁覆天下者幼孤長扶禁槎孽畜鯤鯪太和在宇宙間上動飛鳥下亂

沈登瀛按疑躍字

淵魚如其廣大也諸省直皆遵行

已久吾潯彈丸地耳既不能附省郡行大利益又不能獨泐寬廣屋舍以容乳嫗良足太息幸里中善信十餘友與沈子匡夏捐資建三楹于極樂庵之西偏以集同志倣吳門現行條例廣收棄孩載送吳門之育嬰堂費省而功宏其利溥矣愚於是願請益焉一曰廣募助凡建善功必集羣力若使先期募資儲以有待則任事者無匱乏之虞為善必力矣一曰廣勸脩善政豈止育嬰凡民之疾痛無告者婚喪莫辦者患難莫救者二三同志月中會集茗接清談挑剔善事設勝

沈登瀛按疑法字

方便次第行

之則仁施洋溢庸詎知非王道之一助哉孔子曰吾觀於鄉而知王道之易易也願與同人共勉焉是爲記

按文中亂字勝字並不誤沈氏備志

所校非也

積善庵刻石

康熙四十一年正書舊在積善庵今在磧沙寺殿後庭左壁據拓本載文

江南徽州府休甯縣信士弟子黃祥喜助街沿一帶崙祈早生長命之子諸謀遂意闔家迪吉福有攸歸

康熙四十一年孟冬月立

重修祇園寺碑

康熙五十三年正書在祇園寺據拓本載文

潯溪之祇園寺勅建于蕭梁關乎一鎮風水而潯亦漸成一大聚會歷唐宋元明圯而復興凡當道入境蒞任者例於斯接摺紳耆老訪士俗民風寺固必不可傾圯者也順治初分兵于潯

南潯志

卷三十八

碑刻三

十一

越五年而移寓祇園戎馬蹂躪僧眾散盡荒穢不堪歷有歲年有東隱和尚過此矢願修葺賴寺隣隋雲卿勸分三載而不得興工屢呼將伯于

守又適地方有修塘建橋之役

徘徊久之然東隱之誠不可

一旃檀會得友二十人各

先輸三金爲首隨眾勸募不踰年而堂殿告成椽桷改觀予固與會友悉心經理是藉諸善信樂輸之力也工旣竣恐善信姓氏湮沒爰命工勒石以垂不朽并工料附焉夫東隱之始而不得興工也眾咸以緇流與僧徒雜處無別或指舊務可安伍或置附近 遷營

捨而卒無成功豈其間亦有或

使之或尼之者耶則夫遷徙營房爲 園第一善事予固以暮年重聽有志未逮端有望于將來之大護法者

共收銀三百三十二兩三錢一分零共用過銀三百四十
二兩四錢七分零開列如左

此後有捐施善信題名銀數及工料價目並不錄

大清康熙五十三年歲次甲午八月 日里人丁有源捐貲刻
識

按碑以寺爲蕭梁勅建較貞觀勅建之說尤妄

廣惠宮碑記

康熙六十年行書在廣惠宮未拓據潯錄載文

靜涵道師持法於潯南廣惠宮一日者錄其歷來碑志哀次成
帙屬予曰此先師墜言願有記也按宋治平間建靈濟張王廟
卽祠山大帝行宮中爲三清殿後爲東嶽殿此廣惠宮之緣起
也由南渡以迄元明壞成不一萬厯四十八年起其廢于灌莽
中蔚爲寶坊者住持朱太和締構之朱董兩巨家伙助之此廣

南潯志

卷三十八

碑刻三

十二

惠宮之中興也崇禎十年暴風迅雷一燬而盡附會其說者謂
雷部與水部雨火激射亦荒誕而不經遷延至

本朝順治十五年方得重建頓復舊觀謀始則住持之沈允修
落成則里紳沈銓部此廣惠宮之再興也殿東北隅創爲彌羅
寶閣廣袤五丈有奇高三丈有四尺上奉昊天至尊中供圓明
斗姥梵繚迴帶寶相莊嚴縹緲飛霞彤髹眩朗則住持沈允修
與靜涵師募不辭勞徵君董帷儒暨諸善信樂輸廣勸厥功偉
焉此廣惠宮之大成也予不禁喟然歎曰凡事之興廢豈不以
人哉彼王侯第宅千門萬戶無幾何時而高臺傾曲池平矣方
外羽流守此十笏地卒能故者復新隘者漸廓發宏誓願積黍
成邱人之所關良非淺鮮昌黎有云莫爲之前雖美勿彰莫爲

之後雖盛勿傳其靜涵師徒之謂歟雖然有天意存焉不可謂
非神之靈也嘗攷稗史載祠山遺事云帝姓張名棟生而神奇
將引苕霅二溪之水通至廣德身變豬龍掀泥掉石被家人窺
見遂不果後成祠山之神夫六十里之水路未通帝之所遺憾
也江鄉山谷香火繁盛潯溪一鎮祀事縣長何莫非帝之所式
憑也又況亦臨亦保斗閣崇隆天人感召之徵在呼吸間乎予
故爲述其源流而系以銘銘曰碧潯滌洄毓地靈街市合沓闐
闐盈祠山廟貌垂千齡彌羅寶閣新崢嶸琅函紫笈金光騰鳳
幡月駕凌蒼溟赤玉龍書呵百神周元初後傳雲初天樞掌奏
廣惠尊宮名恰合如師承元宗法派由青城紺琳永護人天驚
翠巘有石潤且貞磨礪鉤畫鐫斯銘

南潯志

卷三十八

碑刻三

十三

康熙六十年歲次辛丑文選司郎中清溪談九乾撰知德清縣
事錫山徐珽書廣惠宮住持周道昱勒石

按石嵌府城隍殿左壁爲侍從塑像所隔未能椎拓

禁除錮弊告示

康熙六十年正書在祇園寺額題奉憲飭禁腳夫分坊勒索碑十一字文不錄

沈節婦墓誌銘

康熙某年據鈔本載文

潘耒撰文

嗚呼食人之祿有死無二者謂之忠臣處人之室有死無二者
謂之節婦若人者未嘗知其主之必危夫之必殆也與同安樂
中更變故不渝其守人猶難之若夫見其已危已殆而捐軀事
之履險蹈艱鞠躬盡瘁豈不尤難而尤艱哉節婦烏程溫氏貢
士模之女歸同邑沈文然溫沈皆苕中望族文然祖演爲大司

寇父及兩兄皆舉于鄉許婚時方鼎盛已而金陵有大獄詞連伯兄論死籍其家文然以出嗣免猶坐仲兄科場事與叔兄偕徙塞外方獄急時有言婚可解者温女聞之慟哭求死父母乃曰世固有甫婚而夫遽亡者壻長流與死等此女命也復何怨但沈氏不可無後當及其未行而嫁之遂請於官出獄就婚仍時時就繫如是三年乃行於是舉一女一子臨行時子猶未出腹也二親尙未葬節婦曰此大事夫去孰爲主者不謀族黨剋日襄事令文然視復土而行既行家難尙未息有奸民王式者以沈氏籍產不盡訴於官徧厯監司督撫以至部寺所株連百餘人涉訟八九年迨親王廷鞫始抵式罪而沈氏田宅尺寸無留者温之資裝亦盡中間文移駁詰吏胥誅求千名萬狀親屬

南潯志

卷三十八

碑刻三

十四

或坐視或陰下石節婦旣備嘗慘苦而能審機應變不挫不擾故家破而猶能立孤其明哲有丈夫所不逮者文然至徙所僅二年而歿萬里負骨歸節婦瀝血驗之乃葬文然生母與嗣母並在堂節婦事之曲盡孝謹生母病痿節婦扶持卧起三十年如一日文然之叔兄先聘於徐難作請婚不卽行瀕行乃成婚竟無子節婦與徐同室而居如親姊妹叔兄遺言以家產盡與弟之子節婦不聽卒爲立嗣其臨財能讓如此治家一用勤儉年荒屑豆爲糜自食而奉舅姑及膳塾師如平時教子女有法度慈而能嚴婚嫁旣畢節婦力竭心枯發病以卒卒於康熙丙子七月望距其生順治乙酉十二月九日年僅五十有二子琬娶吳氏繼娶凌氏女嫁温祇愿嗟乎當沈氏禍烈時使温氏稍

稍觀望則文然不得婚若敖之鬼且餒何有門戶節婦矢死靡他延宗祀於一綫茹荼嚙蘖備歷人世之艱辛卒使沈氏亡而復存碎而復完與尋常秉義守貞者難易何啻倍蓰而其父母兄弟咸共成就之牽連破家終已不悔豈不亦賢哉温之先有陸太孺人以節孝聞有家訓行世其子寶忠先生官新安明亡闔門殉難今節婦殆聞陸母之風而興起者歟而世之爲寶忠者何寥寥也琬將以某年月日合葬節婦於其考之兆以狀來請銘銘曰夫亡守貞婦道之常遭罹奇厄不亡而亡子猶在腹夫乃投荒生分死別地遠天長況家多難如沸如羹莽蜂辛螫矢集於牆藐茲弱質懷冰履霜不競不絀維義之將如操尺施涉海汪洋如持寸針紉百裂裳精誠所感天日迴光漸出坎窞

南潯志

卷三十八

碑刻三

十五

以登康莊備舉喪葬孝養高堂撫孤有立貽謀允臧功存宗祀德衍蒸嘗展矣禮宗俾也可忘宜旌於國宜表於鄉刻銘幽宮萬世之藏

義塚碑

年月無攷在瞭里義塚地文已全泐

一線泉題字

無年月正書在西柵祇園寺後

姚允修生壙志

無年月在南柵萬古橋西額正書太學姚允修先生生壙志五行二字志文未刻

重修嘉應廟碑記

雍正三年夏光遠撰石舊在嘉應廟今佚據董志載文

考之祀典凡有功于民社者則祀之故村鎮之有土地猶郡邑之有城隍也雖在窮鄉僻壤一隅之地方井之中必奉一神焉以爲福國佑民之主況于日中爲市烟火萬家較于郡則不足較于邑則有餘者乎崔李二神嘗捍禦巨寇出金錢粟米以活

潯人一時之饑饉者得以蘇困故其歿也建祠以祀之錫其廟曰嘉應尊其號曰明王吾潯之民社于是乎寄所謂土地者寔昉于此自宋以後其廟之圯而復葺者碑碣無存莫可深考前嘉靖壬辰予六世祖朝端公捐貲闢地合鄉之紳士而力新之讀其所刻石猶可想見其規模焉數百年來風雨剝落金粉零星雖香火依然禱祀如故而廟貌之不堪已甚夫民社之所存而神不得妥閭閻之責也祖宗之所舉而後不加修子孫之過也余嘗履其地而歛歔者久之謂得有人焉起而任募建之勞以冀重新之日斯亦幸矣歲癸丑僧人三默來主是祠慨然以修祠爲請予因手冊而興歎曰嗚呼其崔李二神之靈之默以以相之也乃如是乎潯之人無不以二神爲庇當無不以二神

南潯志

卷三十八

碑刻三

十六

爲心者予因知斯役之有成也經營伊始吾鄉之相勸樂輸者莫不歡欣鼓舞如給惟正之供不二年間向之所謂風雨剝落者今則堅牢而固緻矣向之所謂金粉零星者今則軒翔而華彩矣其峙于左者則有藥王殿其輔于右者則有五路祠洵哉爲一方之保障乎落成之日將以紳士商民所捐助者勒其名于石垂諸不朽因請予爲記予不獲辭爲敘其畧如是後有來者庶知民社之功不可沒而予所志焉未逮者寔藉諸君子之有以助我云雍正三年夏四月記

飭定牙稅統分解告示

雍正十年正書在廣惠宮戲臺下文不錄

周道昱贈言刻石

雍正十一年舊在廣惠宮今佚據張丹山潯溪棹歌注載文

禱雨贈言

江都唐紹祖

周子靜涵生本儒流去爲羽客形骸戍削寒流石上之松狀貌清奇秋月池邊之鶴闡揚眾妙宗五千道德之言驅策羣神服十二靈飛之事惟是誓心以濟世故不晦跡以沽名凡遇癘疫災荒厭禳祈禱如明鏡出匣展卽形呈似洪鐘在懸叩而響答而且出其餘緒著爲篇章麗句清辭坐曹唐于北面偷聲減字立張羽于下風此則翰苑爭推文場交譽者矣茲者吳興之地亢旱爲災職忝承流心懷憂惕爰延絳節用告蒼穹登壇而玉女披衣奏籙而金烏掩彩風聲入樹預聞管輅之占雨點隨車立應樂巴之嘖可不謂盡脩眞之能事得持斗之祕術也哉於其歸也句以贈之

仙根不信自蓬瀛請看形神比鶴清曾向崆峒傳道訣共知句

南潯志

卷三十八

碑刻三

十七

曲有詞名魚龍白晝聞琴舞雷雨青天聽令行會見方瞳徵壽相何須人報束長生

昱

本山人團瓢守拙歲癸丑六月湖屬苦旱郡侯唐公暨各

當事爲民禱雨召

昱

登壇實惟眾籲之誠致沐甘霖之沛謬

蒙獎賚愈切慚惶謹勒感思以志不朽時 雍正癸丑九月

廣惠宮道人周衍昱恭紀

贈靜涵周鍊師

樵李王泓

汝南周子神仙客九天謫下靈秀窟家住潯川廣惠宮身通太乙陰符術狀貌清奇迥不凡秋水精神野鶴骨羽褥星冠嚴束裝琅函玉笈勤披閱有時驅神遣六丁妖魔魑魅潛逃匿從教口內嘖成蜂還向雲端梯取月家法立初一脈傳況復顛仙狡

猶極生平習靜大名垂鎮日補閒新句得儷青鬪白更填詞不
數柳歐香艷墨往返清溪酬唱多流響遙分苔雪側蒼雪今年
患旱魃三伏炎蒸火旂赤山原高壠苗欲枯車戽良農力旣竭
賴有同城賢使君蒿目焦思倍切切憑空高築斗罡壇延請仙
眞祈雨澤升壇旋施靈籙祕風印羽符持斗訣羽步踰躡用告
虔天曹次第勤供職須臾膚寸起層雲黯黯濃陰幕六合驚人
阿香鼓數聲過眼金蛇光一抹便覺甘澍早沛然點滴飛揚到
車轍感君綠章得奏功令我羽扇多生色今君辭歸洞府去長
伴烟霞并泉石應知眞素善韜藏更羨詩文足怡悅古人贈處
恒以言我詩贈君兼惜別他時挂冠容訪君長生願乞丹砂粒

重建通利橋碑

乾隆四年正書在華家橋東塊未拓據鈔本載文

南潯志

卷三十八

碑刻三

十八

竊聞善事必勒碑以誌者示不忘也曷示乎不忘一以著前賢
之能創一以鼓後哲之能興凡事且然而橋梁尤甚如吾里之
通利橋考厥遺碑元副帥許公明成化間重脩名曰通利蓋取
大易利有攸往之義迄于今已二百七十餘年歲久傾圯行者
趑趄己未秋吉日起工八月吉日告竣皆同里中諸君好善捐
資同心協力以故易而成成而速也非敢誇張竊效前人鐫名
于石以示不忘云爾

此下善姓
題名不錄

乾隆四年歲次己未九月

穀旦立

北迴橋碑記

乾隆九年石在雲興寺文已全泐據潯錄載文

距南潯鎮之北三里有橋曰北迴蓋以河流太激築此以束其
勢使之迂迴而不迫故名其創自何人與始建歲月俱無攷或

云蓋明嘉靖間董宗伯份實創建之乾隆二年冬橋圯圮五六年未克修步者不便而水奔衝直下舟行者怯焉蓋南潯之鎮市井闐閤人民之富蕃百貨旁午號稱都會而北柵爲最於是其紳士吳君繼成張君文光元粲董君某等輒慨然各捐已資以爲士民先又承士民之好義者俾各視力厚薄以爲之助橋成高二丈八尺長九丈六尺用銀七百兩有奇以乾隆八年之二月始作而以明年之八月告成由是不病涉水不病衝凡南北往來之人無遠近胥蒙其利焉蓋古者道路橋梁皆各置官以專司其事故九月除道十月成梁如春耕秋斂歲有定規至期則趨事赴功天下盡然是以道無不可行而川無不梁也其後先王之教旣廢一切皆寢弛不治世之人安常習故取便

南潯志

卷三十八

碑刻三

十九

目前又或以爲眾人公共之事而焉用一己之汲汲爲也噫彼浮屠廟院之興廢更復何與人事而崇奉其教者輒爲之經營措置雖重勞且費不惜焉如移彼之所以勞且費者而用之於此則人無不可濟物無不可利矣彼之空孰若此之實舍其實而求之空其亦不思也歟然則如數君者其識爲不可及矣先是徐君行達方謀修復未及興工以卒其子祖彬欲有以繼父志而未果屬張吳諸君捐資率先並悉力以爲之贊襄而其橋以成嗟乎人患不爲耳爲之豈有不可成者彼挾其雄貲厚力坐觀成敗而漠然不一動於其中者是誠何心哉是誠何心哉於其成也書其爲之年月與其名氏以示後之人使得有考焉乾隆甲子荼月歸安具茨山人茅星來謹撰

按今雲興寺庭中橫卧二碑皆漫漶無一字其一當爲雲興寺碑其一當卽此記寺僧云尙有一碑已砌入佛座下不知何碑也

重建沐鳳橋碑記

乾隆十一年正書在西柵沐鳳橋未拓據鈔本載文

潯西沐鳳橋在垂虹橋之西南距鳳凰池不數武昔人以池名橋誌古蹟也與垂虹均創自漢代歷唐宋而至本朝建脩不一載在邑乘由來舊矣垂虹跨荻塘之正流沐鳳疏苕溪之支派人民絡繹負販驅馳寔百物之通衢爲四民之要道也橋內向因淤塞去春里中好義者捐資開濬舟楫稱便焉顧橋圮石敲仄往來者咸有戒心僉議重建因鳩工伐石撤而新之址仍其舊工堅于初其規制亦較舊加宏壯工旣竣復以餘資補葺

南潯志

卷三十八

碑刻三

二十

垂虹尾塊兩橋圯然行旅相慶經始于乙丑年季冬落成于丙寅年仲夏凡茲工費均出善信樂施爰勒石以誌其姓氏而捐資濬河者亦得附載于後以並垂不朽云爾

此下捐資姓名不錄

此碑寄砌于周宅牆垣西面立碑工料併吃用一兩四錢碑已刻就外加碑銀一兩酒資一錢鐫碑供繕五錢所餘舊石數段補修鳴鳳橋東首官路訖造橋工料出入里人紀宿華屠聲聞互相經手并同里眾公屈大士庵省幻師叩梆月餘鹿門紀再思宿華甫書

乾隆十一年歲次丙寅伍月

按碑謂垂虹沐鳳二橋創于漢代荒渺無據

重建隨糧王廟碑

乾隆十一年正書在東柵總管堂據拓本載文

書云丹雘意取維新雅咏竹苞志存縣遠潯東

勅封隨糧王廟上既護國下復庇民辛酉歲眾慮年遠就傾遂
因募資重建未能壯麗聊異茅茨顧目前雖免飄搖而他日當
為久計殿後僅有薄田貳畝門旁祇餘店屋兩間租息無幾正
供難繼于焉共襄小會相與各捐一金生息則慎擇輪流 神
誕必應期恭祝凡我同志務期矢慎矢公願彼後賢尤當有終
有始計除實用謹錄存餘間有工脩稍資補湊並非利其利不
過公濟公庶神光永照慶 聖壽于無疆俊氣長瑩幸宮牆之
鞏固同人姓字序勒于茲 此下題名不錄
龍飛乾隆十一年歲次丙寅桂月 穀旦立

立願經始董啟偉 勸成沈啟麟

南潯志

卷三十八

碑刻三

二十一

華萬九撰 金載陽書 王西溱刊

署通判吳繼元去思碑

乾隆十三年正書在通判署大堂庭側禾拓據鈔本載文

署浙湖鹽漕水利南潯督捕總巡分府吳大老爺去思碑

公諱繼元字季亭江南通州如皋縣籍乾隆辛酉科舉人於乾

隆十二年十月到任於十三年七月初一日卸事在任教民愛

人治行卓然卸事之日衿民攀援莫逮追思公德敬立此碑

大清乾隆十三年七月 日穀旦潯鎮紳衿士民 陸可成

温文煜 陳成 吳繼成 陸紹儒 張世杰 陳昭

金渭 張元燦 紀復亨 徐祖彬 馮學深 邢廷金

紀廷輝 倪廷林 計士枚 莊學川 董小坡 張維垣

董 金樸 陸濂 吳巖 凌錦 丁麟 蔣大潮

徐德元 敬立

沈宗騫書洛神賦刻石

乾隆三十二年正書石藏東柵朱應垣家文不錄

澹慮堂墨刻

乾隆三十六年汪鳴珂摹刻凡九十餘石藏東柵龐元濟家

呂新吾先生身家盛衰循環圖

乾隆三十九年葑溪吟香堂沈嗣昌刻凡二十行行二十一字

藏張氏適園文不錄

呂新吾先生理欲生長極至圖

刊人年月全上石藏張氏適園文不錄

東藏寺造像磚刻

乾隆四十七年正書在東藏寺大悲殿右壁據拓本載文

本鎮護法張潤之敬裝

大士金相一尊并助

龍庭萬年寶

座方磚一堂

乾隆四十七年六月

敬立

真武井題字

乾隆五十八年正書在善寂庵文已見河渠

南潯志

卷三十八

碑刻三

二十二

墨妙樓法帖四卷

嘉慶初年輯里温純刻

重建通津橋記

嘉慶三年正書在通判署頭門外左壁據拓本載文

中南潯而跨運河者有通津橋焉癸丑年余莅任茲土橋漸圯行者苦之且運河轉漕者也余職司水利僭糧艘通津梁與有責焉初下車顧斯橋而有志新之憚輕舉今年春公庭事簡屬紳士耆民而詢之皆曰可願為勸捐一時捐者恐後多寡有差不踰旬而數具乃召工而度之高二丈七尺六寸視舊增三尺廣四丈八尺環延八丈俱如故趾故有四礮復釐而正之估料二千兩估工六千工權造浮橋木價五十兩疊運山石舟價七十兩巡視工作食費一百六十兩限以程期三月而竣余始恐橋之艱於重建也賴紳士耆民勇躍勸捐而好善樂施者又爭

先恐後遂使艱者亦易凡橋之宜重建者視此焉可矣余何幸而得遂此志於潯之士民耶秋九月會余將入

觀爰舉紳耆姓氏暨好善樂施之人畧勒之於石余不敢攘善也余惟計工料程度而一一誌之俾後此興工作者有所攷核云

湖州府通判陞任台州府同知時敏撰并書

董事

毛	邢	馮	吳	作	謀	丁	鳴	鈞	金	大	鯤
馮	鴻	倪	鶴	鳴	郭	楠	龐	文	邱	文	岳
華	行	韓	峻	孫	秉	宗	溫	國	標	蔣	大
陸	大	諸	魯	全	吳	若	昂	溫	國	標	蔣
歸	大	諸	魯	全	吳	若	昂	溫	國	標	蔣
盛	士	松	張	應	元	溫	吳	耀	德	宸	蔣
盛	士	松	張	應	元	溫	吳	耀	德	宸	蔣

嘉慶三年九月

按碑題時敏撰并書實則里人邢典撰邢鴻書

南潯志

卷三十八

碑刻三

二十三

再申例禁告示

七字文不錄

嘉慶五年正書在通判署頭門外右壁額篆書奉各憲嚴禁輕課醬貨不得越賣重地碑記十

嚴禁阻葬告示

嘉慶七年正書在師善堂內額題奉憲嚴禁阻葬索擾碑記十字文不錄

禁阻葬火化告示

嘉慶九年正書在師善堂內額題奉憲永禁四字文不錄

紫藤花館帖四卷

嘉慶十六年秋吳江徐氏刻凡三十一石曾藏周昌富家今歸劉氏小蓮莊

周昌富跋王申春余遊吳門道經黎里偶於骨董家得觀紫

藤花館石刻為山民徐先生舊藏皆一時名公鉅卿與夫翰墨名家者余展玩數四不忍釋因出重價購之時余以楫華仙館之側構一亭亭旁先有古藤數本即顏其亭曰友石并為之記人知物必聚於所好而不知未聚之先造物已不啻早為位置後之覽者亦當為斯石慶得所焉同治十一年夏

六月南林芸齋周昌富跋凡八行字數不等

劉錦藻跋右徐山民待詔紫藤花館帖四卷乾嘉之際大儒輩起譔述之盛卓越古今其以詞章名者亦無慮數十百家文采風流傾動一世下至販夫走卒婦人女子咸以附名風雅為榮何其盛歟待詔天才亮特又生際其時所與交遊類皆文章鉅公主持風氣觀所甄錄猶可想見東南壇坫之盛焉錦藻所居去黎里六十里其距待詔之歿不及百年而流風遺韻人罕能道之者至於紹述樸學祖尙風雅氣求聲應寂無聞焉反覆茲刻不能無盛衰之感也昔仁和龔定盦禮部敘江左小辨謂有明嘉靖萬厯之世江左承平風氣淵雅其故家巨族譜系多聞人或劄一書或刻一帖其小小異同

南潯志

卷三十八

碑刻三

二十四

小小源流動成掌故使拮据倥傯朝野騷然之世聞其逸事而慕之攬其片楮而芳香悱惻以為非俗士耳食者所知於戲觀於此帖其言豈不信哉石為周丈芸齋所藏既乃舉以畀余因嵌置家祠傍舍壁間而題其後光緒二十一年乙未夏六月下澣烏程劉錦藻凡二十四行字數不等

陳母林孺人家傳

嘉慶十七年武進趙懷玉撰同邑汪恭書文三十行十六字石藏張氏適園文不錄

繼述堂記

嘉慶二十年武進趙懷玉撰文二十六行十六字石藏張氏適園文不錄

惲南田王石谷墨跡刻石

嘉慶二十三年汪恭刻凡二石藏張氏適園文不錄

永禁私宰耕牛告示

嘉慶二十三年正書在祇園寺文不錄

南田墨跡五種刻石

嘉慶二十四年汪恭刻凡二石石藏張氏適園文不錄

東坡居士墨竹刻石

凡二石宋蘇軾作元趙孟堅虞集鮮于樞清惲壽平等跋道光元年武進跋并

刻石石藏張氏適園文不錄

錢濬壽詩刻石

無年月石藏南柵錢樹森家文不錄

按首題延年益壽四篆字潘奕雋書高對詩八分書吳之劍詞王以銜閔偉詩並正書錢臻詩行書濬字升九號怡齋監生五品職銜時在道光壬午年七十

汪尚仁墓誌銘

道光六年蔡之定撰趙柄正書并篆蓋凡四石在拜三圩汪氏祠堂文不錄

汪曰楨按先大父字惇夫號靜圃貢生候選主事居府城卒于嘉慶庚申葬城西郎村蒲衣山至道光丙戌先大母合葬始撰誌銘為刻工遲誤未及納入壙中石置墳莊後

移置祠堂

范志碑碣附列墓誌大半墓不在潯其在潯者僅據譜牒及文集所載而石多無攷今凡墓誌

未出土者並不載惟此誌未入壙而石在潯仍載之又舊志有朱國禎修東塘記碑不在潯曹大斌漏澤園記誤以

南潯志

卷三十八

碑刻三

二十五

版為石刻今皆別載附辨于此慶雲為廣其例凡墓志雖未出土而納入壙時先有拓本流傳亦可據以載入

重脩南潯鎮東藏禪寺記

道光十年正書凡二石在東藏寺據拓本載文

環鎮五六里竈烟數萬家其中香林梵刹不下四五十區求其規模宏遠讚頌精嚴率以東藏禪寺為稱首寺不知所昉在烏程縣東七十二里相傳明嘉靖間里大家董氏為之綜覈賴以不替殿前楸珠一本猶蓮池手植自文字散亡碑碣漸滅莫能是正也

國朝康熙中眾紳士敦善樂誠興作之餘兼行施櫓則吾先伯祖悔脩先生實司厥舉至今佛座勒名可攷余年十五六時值薪公自遠卓錫暨徒禹公戮力支梧俾毘盧閣暨大殿觀音殿燬而更新尚憶歲首瞻禮薪公必設果餌雪頂龐麋儼然尊宿

其後遞相遵守不增不減僅遺香燈田五畝二分達公之師東公續置田四畝六分充淨供而已洎乎嘉慶改元今竹峰達公拂衣雙樹仔肩大法禹公僧臘既高西首之際嘗詔之曰薪禪師一生功德而貞珉不曜此未了之業爾其誌之則應曰唯既而達公此上第一石戒行苦嚴日益精進遠近向風慕道雲行水至舍粟布金委輸恐後由是改山門於舊址南數十步廡東新屋十餘楹徑術渠立繚牆完固肇作於嘉慶某年月日落成於道光某年月日崇像設敞法筵潔齋通井匱斲木塗金百廢具舉計用人若干工用資若干兩爾迺龍象琳宮化現涌出緇素之侶鑒其精誠既立方丈遂興道場每歲栖流挂單禮足者以萬計達公心懲往闕追念前塵介溫君稼生踵門乞言以書諸

南潯志

卷三十八

碑刻三

二十六

碣余以不文辭兩年於茲復申前請夫周禮遺人廬有飲食路室候館準是以求則吾儒經濟淪在叢林豈可數典而忘其祖譬諸泰西天算華嚴字母聖門六藝散於四裔苟緣達公之心推而放諸鬢序將烏程義學有五其一在潯者雖至今存可也然則昭往蹟以厲方來殊塗同歸不爲無補允宜濡豪牽連舊事以傳久遠道光十年正月里人張鑑記吳江吳鳴鏘書此

第二石

東藏寺重修山門記

道光十一年正書在東藏寺天王殿壁據拓本載文

本寺住持於戊子秋捐益貲改建山門募諸大護法敬塑

彌勒尊佛護世四王菩薩金相并萬年石座所有樂輸銀數

肅泐芳銜以垂不朽

此下捐資姓名不錄

道光十一年四月 東藏寺監院悟銓敬識

按銓字誤

南潯重修東塘碑記

道光十二年正書在巡檢司署頭門外右壁額篆書南潯重修東塘碑記八字據拓

本載文

里人張鑑撰文 仁和宋烜書丹 錢塘趙之琛篆額

南潯接郡之東關為運河七十里名曰東塘斯堤之創於前明萬曆三十六年郡守陳公名幼學之始築也歷有年所歲久遂漸侵剝案志乘并舊碑紀其如是豈古人善政之所施精誠之所寄各有不同故其傳於後有顯晦久暫之分哉壬辰春邑侯楊公名紹霆奉 檄勸修圩岸爰及東塘迤西三十里郡城紳士任之迤東四十里工歸之潯鎮內潘楊橋一帶夾塘料實工堅估計籌畫侯皆盡力條理焉先是辛卯夏恒雨為災 當事

南潯志

卷三十八

碑刻三

二十七

具

奏蒙

聖恩蠲賑並行稍舒佃民積困維時天嚴寒我侯獨任其事稍暇時與鎮士夫飲酒賦詩得潯水聯吟若干篇所言皆勸分謀諸紳士耆老以工作賑侯力主其議凡三日捐集八千餘緡復委任參軍胡公培荃 巡司胡公次畊 汛守陳公遇春 再勸而推廣之議修東塘鎮人疑之以為東塘之工應屬沿塘鄉莊非鎮人事侯謂勸分以救災也被災以圩岸之不修也鎮既慕義捐有成數矣乃視被災區以為非吾圩岸也而聽之不修浸假而災又至而勸吾捐者又來而負吾租者且益以肆士民受累伊于胡底是以救災不如禦災之為愈也于是眾議息而程工定

職事者咸勉力焉自鎮之西柵起至十里橋舊係土隄改築塊石塘計一千三百丈潘楊橋條石夾塘計一百七十五丈橋西添築六丈皆完固中間坍沒范村集木月影黃明等橋皆建復經始于三月甲子工成五月乙亥資費萬金附鎮另工不與焉是役也郡紳士鳩工在先暨而鎮人繼之通隄之工始竟陳公之故蹟始新從此通驛遞利漕運衛農田獲水利而皆得之荒政此我侯之德溥生民古之循吏何多讓哉勒於貞石以傳不朽解曰

陳公出守 著蹟吳興 隄經水患 浸沒田塍
計年二百 計里七十 碑則未泯 堤且增置
是歲有儉 而民無飢 以工作賑 乃新斯隄

南潯志

卷三十八

碑刻三

二十八

斯隄永固 此水常清 前陳後楊 周道砥平
大清道光十二年太歲在壬辰夏六月朔日

職事沈鳴珂 俞亦彬 温思恩 吳謙 郁榮之

張衡舟 張丙奎 朱立楷 陸樹玉 張永海

錢維鏞 梁鉉 張墀 姚錫章 邱學海

孫鈺 沈登瀛勒石 武林陳纘思刻

重建南潯巡政廳治記

道光十三年正書在巡檢司署大堂左壁據拓本載文

巡司之有署也昉於前明洪武年間在後潘村建設迨

國朝乾隆四年移駐南潯鎮析津何公廷舉詳請勅建衙署卽改爲南潯司百有餘年未經葺理日就傾頽前儀徵朱公應豹曾借廉繕修至嘉慶己卯富平張公鳳來修建三堂花廳神祠

頭門嗣以被水摧圮余於道光辛卯歲來蒞茲土續增整葺並
添建三堂二間需資壹百餘金惟大堂久閱星霜未加修治不
足以蔽風雨而壯觀瞻用是詳請捐廉鳩工庀材亟爲興築復
增設川堂並二門左右兩廊於今癸巳年八月初七日經始至
十月初六日落成計用銀肆百兩有奇雖規制如故而崇飾增
新余於此亦殫志經營焉耳是爲記

道光十有三年歲次癸巳一陽月吉旦

西蜀宜賓胡次畊謹立 平望周龍紀錄

烝字五圩社廟記

道光十三年正書在西莊村小圩五聖堂據拓本載文

世傳莽將能驅蝗而居易錄直以爲宋金壇劉宰漫堂者豈不
以神之所格不可度不可射乎不知人之是不不必較苟有所

南潯志

卷三十八

碑刻三

二十九

以禦災捍患則無不同也烝字五圩爲烏程四十三都震澤下
鄉圩有叢祠頗著靈爽禱無不應春秋報賽靡有虛日相傳神
有封號非汝南鮑魚李核可比道光癸巳冬紳士周士堅等因
耆老之請謁文於邑人張鑑將誌歲月於石乃爲神弦之曲著
其土風焉詞曰

傳芭代舞兮神林幽篁灾侵無害兮稼穡不痒神之來兮黍潔
泉香神之歸兮塗車芻航神聽和平兮民用樂康

是年十一月

里人

金大鯤
談治邦

孫士堅

立石

始緣信士龔天福

按秋水文叢載此文因耆老之請句下有以布施金錢拓
祠宇而新之十一字乃篇中要語書丹者妄刪之則下文

誌歲月句上無所承矣此本五聖廟文乃託言莽將今攷
惠棟九曜齋筆記云羅鶴應庵任隨意錄曰五顯事蹟無
從覈實獨胡定庵謂五行主宰之神而盡廢習傳諸說天
下記之者甚多我太祖建廟鷄鳴山隸于太常故紀定庵
之論以俟攷其說曰本朝神祠見會要姓氏皆可攷惟此
獨無姓氏何耶升曰莫之爲而爲者鬼神也周禮小宗伯
兆五帝於四郊漢儀祠五祀朝明堂圖五方帝位于昊天
之側從之以五人帝五官神皆五行真氣也蓋五行爲天
地間至大之物必有主宰者故曰元囂曰祝融曰句芒曰
蓐收曰后土皆指水火金木土而言若五神豈非默助五
行之造化以福生民乎或者以五聖爲五通非也蓋本朝

南潯志

卷三十八

碑刻三

三十

政和元年正月詔毀五通及石將軍妲妃淫祠至宣和五
年適有通貺等侯之封前後十餘年黜彼之邪崇此之正
昭然甚明尙可得而並論之乎亦緣鄉曲前輩偶傳會佛
有六通弟子五通之說以啟後人之疑耳迪功郎國史實
錄院編校文字胡升書按筆記鈔本多脫誤無從校正姑依原文又祝穆方輿
勝覽曰五通廟在徽州婺源縣乃祖廟兄弟凡五人本姓
蕭每歲四月八日來朝禮者四方雲集然則五聖尙在莽
將之前亦非無可攷也

重修城隍廟後軒記

道光十六年正書在南柵城隍廟未拓據鈔本載文

吾潯之祠祀

城隍神也自

國初時始門殿寢廡規制畧備其後有軒三楹

臨水北向顏曰岸舫實爲朱翁典夔袁翁賡颺諸公所建事在
乾隆戊申迄今已五十年矣岸石棖題漸就傾圮風雨不蔽勢
及寢殿于是前此與事之家約其同志以期鼎新率由舊例各
捐己資哀木石鳩徒眾闕則補之泐則易之漫漶黷昧則丹雘
之凡閱若干月糜白金若干兩而軒之舊觀以復工旣訖朱翁
之孫瑞文承司事者之意屬予爲之記予惟是軒雖若無 於

神明而兆春秋之祀事士女之瞻仰與夫答 神貺者之奔
走賽會僉以是爲休憩之所于以尊廟庭而肅觀瞻則今之所
以踵前功而增修之者其事不偶然也而豈惟是備遊觀已哉
舊無碑記故司事捐資之人俱不詳姓氏今並與重修者列之
于左俾後之人有所考焉謹記

此下有故友眾姓士及同業眾姓士立碑題名不錄

南潯志

卷三十八

碑刻三

三十一

大清道光十六年歲次丙申冬小春月 里人眾姓敬立

丁桂撰 馮尙達書

重修羅祖祠碑記

道光十八年正書在報國寺西羅祖殿文不錄

重修聚星塔記

道光十九年正書在東藏寺塔壁據拓本載文

南潯之爲鎮始南宋理宗淳祐之末前此猶未著焉古烏程邊
境東至平望自太平興國三年割潯溪以東五十里之地隸平
江軍吳江縣於是潯始爲湖州東出之門戶旣爲要地商賈于
此輻輳人物亦于此殷繁漸設稅務置官守而南潯片土遂屹
然成巨鎮顧地勢稍平行旣無邱陵以爲鎮壓又乏湖匯以爲
瀦蓄運河貫其中一瀉無餘論者以爲洩氣太重此前明嘉靖
時董大宗伯所以建浮圖于東藏寺前非特爲一鎮壯觀實爲

一府水 計也第基址建而工中輟故俗以半塔目之迨 國朝康熙中其元孫芝筠徵君重修寺宇并爲塏合尖以其規制未備故名曰聚星閣迄今百五十餘年矣風雨之所剝蝕霜雪之所侵凌日損月壞直有傾圮之慮巡檢宜賓胡公次耕見之曰是入境者觀瞻所係此而不修焉用守土者爲是時虞部温君文禾適以假歸里爰與寺僧達曾商之分請董事各展其力又得通判漢軍陳公天瑞把總錢塘陳公遇春先後勸捐相助爲理其事始集於是鳩工庀材經始於丁酉季春竣功於己亥孟夏費白金千五百有奇凡土木之工三分居其二丹漆塑像鐫字及架木石工十五分之二鐵冶之工十之一雜費亦如其下層三丈則仍其舊其上層五十五尺皆易以新材雖未能上出層霄爲四方表識而亭亭卓立于塏之規制略具遂稱之爲聚星塔今而後東境偏隅得有關鎖爲吾鎮奠湍流卽爲合郡固門戶其有關風水豈淺鮮哉塏旣成寺僧請書其事于石以垂永久余謂是役也諸君之協力與寺僧之宣勞皆不可以不書應與捐貲者姓名並刊諸石故不辭而爲之記

道光十有九年歲次己亥四月里人沈登瀛撰温文銓書吳門

陳錫祉鐫

司事姓名附書于後

生員紀榮炳 例贈奉直大夫工部虞衡司主事生員温梅

辛酉拔貢甲子副榜候選復設教諭張鑑監生俞彬候選縣

丞張永海監生盛士松職員蔣坦戊寅舉人授職翰林院典

簿馮鳴盛 恩貢生候選復設教諭董桐儀監生朱型監生
吳兆澂監生張墀文學朱濂候選州同知張大年辛卯舉人
揀選知縣董榮椿生員沈登瀛

住持達曾 悟詮 本善全立石 塔工姚玉輝

五聖堂善信助錢題名刻石

道光二十二年正書在小圩五聖堂神座右側文不錄

翁方綱書鮑明遠登大雷岸與妹書勒石

道光二十三年倪良燿刻凡三十六行

二十字文不錄石藏張氏適園

禁油車僱工把持索詐告示

咸豐七年正書在嘉應廟牛王殿文不錄